



Fernand ETGEN
President vun der
Deputéiertechamber
19, um Krautmaart
L-1728 Lëtzebuerg

Lëtzebuerg, den 29/01/2021

Här President,

Sou wéi den Artikel 84 vun eisem Chambersreglement et virgesäit, biede mir Iech, dës dringend parlamentaresch Fro un de Minister fir Bildung weiderzeleeden.

An engem RTL Artikel vum 29.01.2021, maachen Journalisten op eng Grupp vun Enseignanten an Sympathisanten opmierksam déi sech ënnert der Form vun der Organisatioun "Nues am Wand" zesumme gedoen hunn, an déi maske-fräi Klassesäll fuerderen.

Um Site vun der Organisatioun liest een Saachen ewéi, "Covid-19 féiert net zu enger Surmortalitéit" an dass Virussen am Allgemengen net gesondheetsschiedend wieren : "Das *Modell* eines krank machenden Virus hat sich im Laufe der Medizingeschichte als nicht haltbar erwiesen."

An deem Zesammenhang wéilte mir dem Minister dës Froe stellen:

1. Déi éischt Beiträg um Blog vun der Organisatioun si vun Oktober 2019 (deemools nach iwwert aner Themen ewéi Covid).

Hat de Ministère scho virum RTL Artikel Kenntnis iwwert dës Organisatioun?

Huet de Ministère Kenntnis doriwwer op Enseignanten déi uewe genannten Theorien un d'Kanner weiderginn?

2. Wat fir Konsequenzen zitt de Ministère aus dëser Organisatioun?
Hält de Minister dës fir eenzel Fäll oder fir eng eescht ze huelend Gruppéierung?
3. Wei kann de Minister den Eltere garantéieren, dass an de Schoulen a Lycéeë just Fakten iwwert Covid-19 un d'Schüler vermëttelt ginn?



Mat déiwem Respekt,



GOERGEN Marc
Député

Mat déiwem Respekt,



CLEMENT Sven
Député



Äntwert vum Minister fir Educatioun, Kanner a Jugend op d'parlamentaresch Fro Nr. 3535 vun den honorabelen Deputéierte Sven Clement a Marc Goergen

De Ministère fir Educatioun, Kanner a Jugend hat bis zur Verëffentlechung vum oppene Bréif a bis zur Diskussioun heiriwwer an de Medie keng Kenntnis vum Blog "Nues am Wand".

D'Positionen, déi op där Plattform vertraude ginn, stellen déi wëssenschaftlech Fundéierung vun der Covid-Politik souwuel hei am Land wéi och am Ausland a Fro. Dobäi schwätzen d'Recommandatioune vu Wëssenschaftler, Experten a Medezinner ronderëm d'Welt eng eendeiteg Sprooch.

D'Maske sinn en essentiellen Deel vun eisem Dispositif sanitaire, souwuel fir d'Verbreedung vum Virus anzedämmen, wéi och als Méiglechkeet, de Fonctionnement vun de Schoulen och während der sanitärer Krise oprechtzeerhalen. Si droen domat en Deel dozou bäi, fir d'Bildungschancë vun de Jonken ze erhalen.

Am Allgemengen ass et esou, datt d'Maske bei den Enseignanten als Deel vum Alldag a vun de Gestebarrièren acceptéiert ginn. D'Enseignantë verloossen sech heibäi op d'Recommandatioune vun den Experten aus der Direktioun vun der Santé an si sinn sech hirer Virbildfunktions vis-à-vis vun de Kanner bewosst. De Sënn vun de Mesurë gëtt deemno vun der grousser Majoritéit vun den Enseignanten net a Fro gestallt, an si setzen d'Mesurë mat Iwwerzeugung ëm, fir esou hire Bäitrag zum effiacen Ënnerbanne vun der Propagatioun vum Virus ze leeschten.

Déi vill Reaktiounen vun Enseignanten an Educateuren, déi sech vun deenen Theorien distanzéiert hunn, weisen, datt dës Positionen net representativ fir d'Educatioun zu Lëtzebuerg sinn. Selbstverständlech sinn d'Enseignantë gehalen, hir Schüler fachlech a sachlech mat Bezuch op pertinent Quelle korrekt ze informéieren. An deem Kontext sollen si d'Schüler iwwert de Virus an déi néideg Gestebarrièren opklären an hinnen d'Risiken, déi vun der Propagatioun vum Virus ausginn, méi no bréngen, fir esou d'Wichtigkeet vum Anhale vun de Gestebarrièren ze ënnersträichen. Déi néideg Informatiounen an déi jeeweileg Quellen heizou stellt de Ministère fir Educatioun, Kanner a Jugend a regelméisseg aktualiséierter Versioun ënnert anerem fir d'Léierpersonal op sengem Internetsite zur Verfügung.

De Bréif gëtt vu mengem Ministère eescht geholl a mir gesinn eis an deem Zesammenhang an der Obligatioun, fir d'Gespréich ze sichen an nach eng Kéier, an Zesummenaarbecht mat der Direktioun vun der Santé, d'Fakten duerzestellen an ze versichen ze erklären, firwat déi eenzel Mesurë wichteg sinn. Allerdéngs ass et op Grond vun der Anonymitéit vun de Signatairë vum Bréif leider am Ament nach komplizéiert, e konstruktiven Dialog mat de Concernéierten ze féieren.

Déi lescht Fro vun den honorabelen Deputéierte bezitt sech op de Contrôle vum bon fonctionnement vum Enseignement; dozou sief gesot, datt deen am Enseignement fondamental vun de Regionaldirekteren ausgeübt gëtt, an am Enseignement secondaire vun de Lycéesdirekteren.